

150.119  
42  
部=9

封邱縣續志

王廣慶題



封邱縣續志文徵文類目錄

論辨類

反學上

反學下

釋憂

審勢

立言

佛教辨正

序跋類

天根文鈔序

天根文鈔書後

古文方斂

古文方跋

春秋本義序

孝經刊誤繼志序

四書大學貫自序

封邱縣續志

卷二十六

目錄

一

開封新豫印刷所承印

書啟類

上吟秋先生書

寄吟秋先生書

重修火神廟捐啟

傳狀類

先府君行實

汝甯府教授何先生傳

墓誌類

松亭高司馬墓誌銘

清故進士邢公印中墓誌銘

清故翰林院庶吉士吏部牛公墓表

張君鴻猷墓誌銘

清邑庠生孫君俊卿墓誌銘

碑記類

重修儒學工程碑記

重修儒學碑記

創建主簿衙署碑記

重修封父亭碑記

重修使君百里公塚塋碑記

河南衡家樓新建河神廟碑記

重修青陵台貞烈祠碑記

奉令豁免車馬雜派差徭碑記

新建封邱汛衙署碑記

重修龍王廟碑記

重修旺龍菴碑記

壩台義地碑記

重修城垣碑記

重修文廟捐輸題名碑記

重修封邱城隍廟碑記

重修封邱文昌閣碑記

倡辦場地請准蠲緩碑記

民產紀念碑記

縣長姚公慰宗救濟水災紀念碑

封邱縣續志

卷二十六 目錄

一一

開封新豫印刷所承印

銘贊類

楊公開三像贊 并序

縣長姚公慰宗救濟水災留影紀念贊

封邱縣續志卷二十六

文徵文 清至民國



論辨類

文徵一

反學上

何家琪

學敝於世久矣三代之學視上之德與其所以教不盡恃書也孔子生春秋見世變日甚不得已以六經示學者曰守此庶無大過也戰國諸子各以邪說爲敵孟子闢之不勝至秦學幾滅漢雖稍修復古書亡失大半存者亦分割增竄政教不甚取法而黃老申韓釋氏雜出以治世蓋數千年惟訓詁義理二家爲千古言學之祖吾人所不能外者也明姚江之學興毗陸攻朱標宗旨提人心其敝也遂空談不讀書我朝之初諸老生已矯之至於中葉聖人在上天下無

封邱縣續志

卷二十六

文徵一

一

開封新豫印刷所承印

事小臣末士皆得以入秘閣觀圖籍退亦獲優游著述以卒其業於斯之時號漢學而自命大師者徧海內矣取其書觀之其所解述不爲無得其敝也敢爲異說務勝前人終身硜硜於一字一音遽以爲絕學在是而逾不適於時近數十年有志之士慨然念世儒類有體無用知古不知今于是倡爲經世之說以時務導天下會寇亂一二豪傑立功名於其閒致使人人曠目抵掌謂天下事大可爲究之其人皆闖蕘鄙賤附顯名趨勢利以自便其私而稍負才者不鑒前法不顧後患但以任事爲能矯飾名譽果於殺人幸其不大用猶可全其身與名否則橫決潰裂其禍不止身受之而後已訓詁日與古習庸裨世教講義理者或詭襲名義不敢顯奸也師心任事謂爲時勢當然而皆可弗顧學者又不得不思有以反之也夫時務不可不知也天下豈有無源之流無本之枝哉

或者曰本源固在今之業進士者孰不本五經四子書以爲學然惟業進士而五經四子書之不廢人道賴以不絕也於戲微矣

反學下

何家琪

欲反之亦反五經四子書而已矣業進士者固未嘗以五經四子書爲學者也何言之父兄之所教師友之所授不過日苟讀之則可以得官衣食有所藉身家有所倚子孫有所託陽竊名而陰刼利古取士謂拔十得五今則拔十得一並不可必之數也雖然制科之法行之數百年矣名臣大儒未嘗不出其間國家於以得人才之用然則法不必改亦在業進士者毋徒倖一第自畫於學而已矣執嗇夫語繩墨不知語百工知之矣執百工語文字不知語儒士知之矣業進士者固知五經四子書者也天命之精君父之尊當代典制之繁且重實

封邱縣續志

卷二十六

文徵一

二

開封新豫印刷所承印

不能不本於古聖人之書知之日言之老死不違一置思者天下皆是也苟卽其業反求之因竊名而顧義因刼利而慮害節其欲定其性養其氣斂其才父兄以是教師友以是授名臣大儒接踵日出雖學復三代可也今之小丈夫稍讀書倖制科得自以爲學成遂自外不足學中年而還閒思別託業詞賦以學古傲當世而於世無用等此功名之說所以鼓蕩人心使人人棄業忘分於寇盜既平之後而無已時與

釋憂

何家琪

書曰制治於未亂保邦於未危易曰其亡其亡繫於苞桑聖人之治天下豈惟祈天永命子孫萬世而已哉其君臣上下固以危亡爲念不敢一日自逸也都之人有善衛身者知陰陽之爲寇必於強盛之年時飲食節嗜欲而後疾病無

所入里之人有善治家者知水旱之爲裁必於豐稔之秋勤本業謹蓋藏而後  
飢寒無所迫一身之疾病一家之飢寒雖其已入已迫庸可徼免而救於後而  
彼二人者必先兢兢焉若恐不免無救而豫爲之防况萬萬於身家而不知患  
哉天下之患始於不知防成於知而不救莫甚於一時倖免恬然以爲太平匹  
夫倡亂火山川墮城郭蹂踐所至徧天下而坐據下邑十數年之久良民之死  
與受汗脅者殆幾百萬一旦殲之山川出城郭復勇將義士戰殉名不彰者亦  
不知幾百萬而一二人收其大功邀極賞文武幕府上名於朝納金粟佐軍者  
皆得拜官於是多立名置公所在在於貧民算百物之稅以濟職與祿之窮破  
法收材至於如此雖牧人之奴賈人之子屠酤傭保技藝雜流皆歎世業不足  
恃棄家賣產徼富貴而官中子弟與四方游客耕無田居無室役事無力讀書

不獲成功而幸天下之平上恩之普乞貸入貲以利一官息什百復幾百萬此  
正君臣上下不敢自逸之日也文帝恭儉賈生痛哭太宗仁誼魏徵極諫眞宗  
春秋方盛李沆日陳四方水旱盜賊之事以彼其時論者疑其過計夫治天下  
甯過計毋爲計不及今之君子或以外爲憂聖人處此不敢知也脩政而已

審勢

何家琪

天下勢而已矣用法亦然夫法不可畸輕畸重也國家承平日久法務寬大寬  
大而畸輕之勢成焉殺人不抵罪盜賊公行莫誰何法一輕而良民之致死者  
亡慮千百人矣變亂旣興法務嚴峻嚴峻而畸重之勢成焉讐誣疑似輒枉決  
賊之脅從者必及法一重而良民之致死者亡慮千百人矣雖然勢有輕重而  
官吏用法之際亦有難焉朝廷于治獄有失出入之條而入重于出斷獄之

吏亦遂有救生不救死之說行乎其間是故盜諱之殺人之罪減之不刑囚無肯承刑之上官又將以爲威逼自誣而坐以失入此爲吏用法之難也若夫良民被禍亦甘諱而滅何也蓋一訴官囚或不承縱歸必陰圖復禍加厲無甯姑忍以待其斃從其黨效其所爲不惟脫禍且獲便利而犯法者亦滋衆矣方其亂也武夫酷吏以功名競及亂已定稍任事者至以罪聞此自古天下之勢所以釁生細故寢至於不可爲也悲夫

立言

何家琪

自儒之名立必其人生讀書之家冠儒冠服儒服與師友日講論五經四子書如是者謂之學道門戶相爭標榜遂熾不幸微賤雖有言行卓卓耳目足以師表海內流傳後世輶軒之使不行國史邑乘不能徧載而文人學士復從而蔑

封邱縣續志

卷二十六 文徵一

四

開封新豫印刷所承印

之以彼其徒自顧無修身立名之具悍然恣肆無所不爲而盜賊起而國家危而天地敝非古聖人志也古聖人與天地配陰陽水火之災旣變理而挽回之鳳凰麒麟物中之豪傑也必特舉爲萬物勸況人爲萬物首習之所移而可復其性也身之所汚而可貞其心也行之所疚而可表其言也曰惟天下至誠爲能盡其性能盡其性則能盡人之性能盡人之性則能盡物之性能盡物之性則可以贊天地之化育於戲立言者得是說而存之其功遂與聖人等可也

右文五首采自天根文鈔家琪字吟秋邑人見人物志及選舉表著有  
天根文鈔天根詩鈔古文方等書

佛教辨正

甯雲衢

中國有孔子西天有釋迦皆聖人也天不生孔子世何以治天不生釋迦善何

以勸佛自漢明帝八年入中國論者紛如或謂佛非聖人昔太宰嚭問孔子孰爲聖人子曰西方有聖人不治而不亂不言而自信不化而自行蕩蕩乎民無能名焉是佛之爲聖孔子且稱之非聖而何一辨也或謂佛教崇尚虛無無益於世曰否中國之人習於多欲英氣相尙不信輪迴不信果報自有佛教以警覺之而人始恍然有悟去惡遷善是佛教有益於世也二辨也或謂佛教愛無差等曰否佛教以慈悲爲主而非一於慈悲一於慈悲則愛無差等非一於慈悲卽愛有差等也三辨也或謂佛教蔑棄倫紀曰否釋迦一身首度淨飯以及摩耶次度耶輪次度羅暎次度阿難是君臣父子兄弟之倫並未廢也而謂之蔑棄倫紀可乎四辨也或謂佛入中國惟楚王英好之最早應可獲佛之佑矣而卒不免殺身之禍則是佛之無靈也曰否英之罪大法所難容佛卽有靈亦

不能佑佛不能佑卽不得謂佛之無靈也五辨也或謂信佛之深莫如梁武帝唐憲宗一餓台城而佛莫之救一暴崩中和殿而佛莫之聞則是敬佛不如不敬也曰否武帝憲宗皆暗主也侯景奸而武帝崇之韓愈賢而憲宗貶之敬佛之功不敵倒行逆施之罪彼卽敬佛佛當有不享其敬者矣而尙望其庇護哉六辨也或謂釋之一教惑人太甚以罪福之說惑庸碌以明見之說惑名流此教之所由盛而從之者衆也曰否釋之與儒異派同源釋之罪福卽儒之慶殃釋之明見卽儒之存養同此一事豈儒行之而爲正釋行之而爲邪乎吾知其不然也七辨也或謂各寺住持僧多不守清規貽害四方僧爲佛之徒僧之貽害卽佛之貽害也曰否楊雄王安石皆通經之彥也一仕莽墜閣一變法禍宋推之聰明妄作之士顛倒是非肆爲不善豈得歸咎於聖耶士不善不得歸咎



於聖僧不善卽不得歸咎於佛八辨也觀此八辨誣佛者可以爽然失矣

右文采自雲衢文稿按雲衢字步仙邑人見人物志

序跋類

文徵二

天根文鈔序

孫葆田

封邱何先生刻所著文曰天根文鈔於汝寧府學署凡若干卷天根子者先生自號也葆田得交先生三十餘年矣始予偕兩弟讀書濟南先生一日不介而造予講學論文志相得方是時兩人氣甚盛不知世有憂患事也其後再遇於京師則予以孤露之餘志意少衰而先生學愈進其氣乃益下既而予改官之皖先生亦爲河南教官別去不相見者數年光緒庚寅冬予赴叔弟闔鄉官所道洛陽再與先生聚將歸先生爲文以贈其行今見於集中者是也自是書疏

封邱縣續志

卷二十六 文徵二

六

開封新豫印刷所承印

往還光陰忽忽又已十年而先生年近六十葆田且六十有一歲矣庚子之秋先生寄書至濼曰春與執事別汝寧東門外言時是相寶涕不圖數月後國家之變至此某弟近碎於官某將力疾往迎其骨與其妻孥前感執事言取生平所爲詩文刻之若執事不忘舊好鑒其業之不復能進指其疵而糾其謬則幸甚葆田明年夏訪先生汝寧學署知又續刻文若干首因戲問云先生集無序得無以待鄙人乎語未畢先生已伏地再拜葆田亦再拜遜謝曰毋令旁人見者謂我輩老而猶狂也初先生游濟南所日接見者惟郭蓋卿輩數人其論文尤喜稱惲子居也以是人皆目爲狂士葆田久與之游乃獨深知其狷介不苟又嘗其與人書云吾文取徑於歸方要當登韓歐之堂入太史公之室其自期許如是及晚年學益深養益純文乃日進於古而又以不得已而有作乃爲

不苟於立言豈非古狂狷之次與顧先生猶欲然不自足嘗謂葆田吾文有小說氣否子盍爲辨之蓋先生文闡幽表微之作爲多其敍同時人言行並瑣事必曲爲傳之至敍述忠孝節烈雖僕隸乞匄苟有善弗沒也故其自言如此葆田既與先生別會是年冬予弟魯階卒光州任所先生寄書慰問並追理前言嗟乎予至此尙能序先生文哉夫人世憂患之端與學述興廢之故見於先生文內者詳矣今予所遭骨肉之戚與先生同而其志氣衰退乃益甚又何能執筆屬詞以重爲先生辱獨念三十年來游蹤離合死生盛衰之際其間可感者恆多而予已無意於人世矣使予姓名得附先生文以傳百世而下不猶如見我兩人於汝甯東門外痛哭時哉今年秋適予編刻望溪文集補遺成乃先生文序之距別先生汝甯時又兩餘年矣時癸卯秋八月榮成孫葆田序於大梁封邱縣續志

寓舍

右文錄自天根文鈔按葆田字佩南山東榮成人著有經潤樓文集

天根文鈔書後

蔣慶第

慶第讀天根集不禁慨息也余吏隱東省五十年初同官聚譚偶涉文辭輒相顧避去以爲腐不十年風會變則有閉門著書相與爲詩課蘄傳久者凡集中酬酢不下三四人皆是也其人不盡產東省天根與之結交則多在稷下騷客下吏貧病無慘之士紛然與公卿列其間其有游陟郡守監司者亦不脫書生吮毫塗抹結習獨異天根寄迹二十年而所得翕羽之助如此其去爲校官亦二十年矣不惟此間典型寥落不復如前而洛汝同志儔侶亦似絕少豈汴省風會盛衰猶齊魯耶然則天根此編殆兩省數十年文人之總萃也天根乃不

自足欲有刪減余謂君文簡勁冷峭可爲繁富家藥石且所存既精而諸君性行遭際因之附見是尤不可漫有棄置者也八卷宜爲定本嗣有造述曰二集三集可耳光緒二十七年辛丑九月同學弟玉田蔣慶第時年七十有九

右文錄自天根文鈔慶第字箸生玉田人清咸豐進士知章邱縣有友  
竹草堂文集

古文方敘

許鼎臣

予師封邱何先生著古文方古文三十四品一卷予前後凡三鈔其初師在洛予問以古文請師示之其繼示予以所歷刪補者最後師在汝南予自孟津往視師師復示予而增注者幾再倍且爲予言稿初脫文氣或且有不屬聯予方擬歸後別錄請正而師遽長逝矣其後予復自同學吳芋僧處得先生補古文

封邱縣續志

卷二十六 文徵二

八

開封新豫印刷所承印

方數則蓋予歸後師寄芋僧并囑轉寄予者因復按次入之附以論文約指爲一帙學徒輾轉傳寫頗訛脫因謀付剞劂於原文則仍舊不敢一字增損以俟當世君子論定吾黨其或有讀而嗜好得所從入以不絕此一綫薪火者乎其講學約規蓋亦得之汝南志聖社規則先生少時與武進楊津生入籍歷城諸生共立者并附於後亦以見先生之學之不徒文而文之外有學當預定所蘄向吾黨蓋尤不可不知也光緒丙午六月望後七日門人許鼎臣識於汝州之  
歧恆齋

古文方跋

許鼎臣

予自汝南鈔先師封邱何先生古文方此本後未幾師沒歲丙午擬付刻就正於先師榮成孫先生先生謂其中訛脫當正囑緩之未幾孫先生亦沒世事且

滄桑意先師原稿不可復識矣歲乙卯乃促學子許其芳至汴付刻工將竟因緣晤先師兩子爲代整頓遺書忽無意中得之校出與今刻本同異或義勝今刻本若干條蓋皆予歸自汝南師寄吳芋僧并囑予按次補入者以此知此原稿蓋亦師所未定之本惜乎無從起兩先生而質之耳他日吾黨讀而嗜好之者尙其鑒諸時十月朔後四日石衡許鼎臣又跋於孟津之龍觜山館

右文二首采自龍觜山館文集按鼎臣字石衡號禹涪孟津人光緒丁酉拔貢中是科鄉試著有小學諷詠助諷詠助引女小學已刻續中州人物考中州學系史等書其龍觜山館文集乃搜輯遺稿就所居地名者

春秋本義序

李時燦

封邱縣續志

卷二十六 文徵二

九

開封新豫印刷所承印

春秋一經聖人撥亂反正之大權所謂據事直書而義自見者也必徵其事以實之或失則誣必求其說以通之或失則鑿說是經者亦難矣况自帖括興而經學廢聰明之士率汨沒於詞章欲求一通經知古者或千百里不得一人焉甚矣其弊也封父鄭君持所著春秋本義介余友樊君愷臣辱以示余余受而讀之見其用力也勤其措詞也簡而主魯立論尤爲先儒所未發且皓首窮經安貧樂道亦未易於近今求之余譴陋寡聞學殖荒落於麟經遺旨尤屬茫然乃顯揚未遂而已爲在疚之孤撫鄭君茲編益滋愧矣勉綴數語用誌顛末鄭君其何以終教我乎乙未仲春汲人李時燦識于瞻帖之室

孝經刊誤繼志序

李時燦

封父鄭君老而好學余旣序其春秋本義矣丙申秋余友樊愷臣廣文復持所

作孝經刊誤繼志示余余受而讀之淵乎多自得之言蓋其用力也至矣慨自秦火而後世之所傳孔氏書論語尙已其次若戴記中經解儒行以及坊表諸篇率皆門人弟子附會而成至家語孔叢之屬其駁雜幾不可讀孝經一編論語外之最醇者然猶未敢必其盡出於孔氏之言也朱子刊而正之經傳犁然而聖賢問答之旨乃不爲羣言淆亂蓋朱子之功於是爲大而未竟之緒或猶有待於後人也鄭君起而任之何其願之宏歟其斯爲無待而興者乎然余竊更有進焉古人之傳經也必併其所以至此者而亦傳之然後可以俟百世而不惑蓋不徒曰言之文行之遠也立身之業顯親之實旣以自勉抑猶爲君望之庶幾附於責善之義也夫丙申仲秋汲人李時燦謹識

右文二首各錄自原書按時燦字敏脩汲縣人清進士

四書大學貫自序

鄭貽哲

四書爲六經階梯孰不奉爲先入之言而朱子有云大學是爲學綱目先通大學立定綱領其他經皆雜說在裏許又曰論語孟子都是大學中肉菜若不把大學做個匡殼子卒亦未易看得又曰大學是通言學之始終中庸是指本原極致處是知本大學以貫論孟中庸未始非讀四書之切要事也惟論孟散出不分其類而標之無以與大學比合中庸入微不尋其要而指之無以與大學會通故余作大學發凡又作比類二卷指要一卷名之曰大學貫以資學者之觀覽吾人奉朱子之教一日讀大學一遍看他如何是大人之學復執是編以與大學相參焉則朱子所云先讀大學以定其規模次讀論語以立其根本次讀孟子以觀其發越次讀中庸以求古人微妙處者其亦不待他求而得之於

此矣是爲序光緒丁酉上元封邱鄭貽哲書

右文錄自原書貽哲字曉亭見人物志著有春秋本義孝經刊誤繼志  
四書大學貫孔文蠡管等書

書啟類

文徵三

上吟秋先生書

許鼎臣

鼎臣頓首奉書吟秋先生左右鼎臣生僻陋八九歲時家父課之讀十三四歲就外傳學爲童子藝既又學爲舉子業日取所謂腐爛朽敗者獨夜放聲高誦兀兀不休久之覺其陋然以爲學固祇此耳間見人案頭韓歐文好之退與所相知高齋堂者私相詫以爲古人豈場屋所用體文也今世胡不聞有爲此文爲此等學者遲遲七八年始克識先生於是始知今世有爲古人之學爲古

封邱縣續志

卷二十六 文徵三

十一

開封新豫印刷所承印

人之文者齋堂則慨然欲與鼎臣效爲之而鼎臣方騁詞賦絺章句奔走名場追逐時好竟不克一日學光緒丁酉舉一科喜曰吾自今乃始可棄俗學從吾師何先生遊而先生於是去洛矣烏虜士生今日上之不能把持華夷要領佩相印擁節符舉足動中外噓氣變寒溫使萬國和同一家宴然無復人敢言兵革中之又不能搖尾於犬豕借威於豺狼縮首降心抑抑拳拳時恐不得一當其意百用其媚以冀我悅然後赫然臨萬赤子之上莫敢誰何下之又不能椎髻其首侏離其音談五州辨三角日黃鼓其讐言盲論以張讎仇訕君親悚動當世之王公大人三者無一有而猶孜孜懇懇於窮山深林幽巖絕壑搜討補綴舉世以爲迂闊不祥所擯斥惟恐不速之務則枯死亦幸矣而其中乃復悒鬱哽咽悲憤填塞而終耿耿焉若不可以不達其亦可爲不識時務之尤者是

亦不可以已乎雖然蓼蟲習荼有味乎其苦雖天地不能易之以甘物無大小各有其志不可強也鼎臣生三十年矣懼終負吾先生之所期而日卽於墮棄於是從黻堂後始一爲之而下筆輒慙慙不可耐其視黻堂之作之卓然有見於道能得古人之意者不可同年語矣然而鼎臣及今能棄其俗學敢執筆學爲先生之所爲則又豈向者與黻堂齷齪土室中一鐙坐歎以爲當世未嘗有此等文者之時之所及料也哉而猶計其工不工歛歛感歎於世俗之好尙其視不自信而見誘於天下之一切者復幾何與謹錄近作十首寄呈惟先生哀其志而繩削焉而並舉黻堂以告先生又以見洛陽聞先生之風私淑而興者之大有人不盡庸庸如鼎臣也黻堂名猷住伊水之南嶠山村四月某日鼎臣再拜上

寄吟秋先生書

許鼎臣

鼎臣頓首吟秋吾師先生座右春季趨汝陽晉謁先生寓鼎臣於學齋之許樓款留浹旬爲縱論古今文藝爲言歷年遭值骨肉之痛爲歎傷時事變異爲出去洛以來撰述爲書揮毫盡十數紙爲特書官洛時作務實篇相勸勵爲言君臣之義根天性讀書人豈宜忘國家爲言古文一綫薪火之傳不可使斷絕爲言願足下今年不得進士鼎臣何幸得是於先生也鼎臣今年挾一硯數枝鷄毛筆出赴進士科也而至汴冒雨出南郭門獨愴然拜黃先生祠下謁佩南先生卽留寓大梁講院得借讀富陽夏滌庵先生集闈後則南謁先生往返一千六七百里手抄佩南先生與吾先生並滌庵先生詩文統八九百首歸來發篋讀則佩師文如堅木也如澄泉也如核在果而足在履也如幽巖古屋老桂霜

菊逢時吐華而無人自開落也吾師文如鳴潮滔滔捲地也如高秋茫茫風雨自天至也如空山琴聲自來往也如閒雲如枯僧也如洞庭瀟湘木落月明君山數點隱見湘君恍惚出沒也如怨如思如歎如慕如語不能語嗚咽泣淪漣而聲吐復吞也滌庵先生文則或如立閭闔而俯九州也如雷碎如電驚也如布帛如五穀如質厚什器也如砥柱植頽波而萬撼不搖也如鑄禹鼎然通犀而魑魅不若精怪閃忽無遁形也如萬蕪草之荒蕪而忽見瑞芝嘉禾萬梟獍之鳴號而忽覩鳳凰麒麟也當其曠然得意欣於所遇則如慄慄執經高密泰山不敢一咳唾旁睨也如揖司馬子長歐陽永叔工部太白而聯襪接袂也如親承望溪惜抱而受文章義法也如登三魚堂入楊園之座而聞其講論悚聽其厲詞震喝也而是時款吾門來弔者則且曰不得進士嗚呼翊聖朝之景運

致糾紛於承平當世豪傑竭智盡力衆矣鼎臣質既冥頑而性嗜枯槁則願搜繹乎天人性命之原窮探乎秩敘彝倫之本硜硜於出處進退介介於辭受取與期鍊之於造次顛沛死生利害不變易而甯隘不敢肆甯拘不敢通甯蒙姍笑斥怪不敢自疑其有餘力則闡表所聞見忠臣孝子義夫貞婦以寓其拳拳愛慕以此報國家卽以報先生惟吾先生有以教我先業師楊伯峯先生乞見之先生文成否澹庵文鼎臣終必能刊刻以成師志牡丹圃世系卒葬月日并附去九月初七日鼎臣頓首

右文二首錄自龍觜山館文集

重修火神廟捐啟

失名

蓋聞職萬家之烟火首重先炊握一邑之恬寧必尊司燿觀炎炎之燧木奚須



吐自口中指赫赫於蕭邱何必燃從雨裏惟此封城卓爲名邑當吳晉爭盟之際戰壘如雲迨河海清晏之餘民居似櫛爰有火神之廟建於朝闕之門創自前明葺於盛世既日月之如流遂風雨之不蔽神靈黯晦雙扉冷落秋風殿宇荒蕪三徑蒼涼夜月覩數椽之廟貌大廈將傾覽周圍之垣墻短垣欲壞本縣春秋享祀彌切悚惶朔望行香時懷愾嘆適因首事某住持某矢願重修俯允所請慨捐清俸倡以引言惟願四十八村二十六社各出囊金共成善事祇祈無慚於後觀不必有光於昔日棲神有地食報無涯將見封阜千門家家宿燭平邱萬戶處處朝烟瓊宇不陳莊叟之傳薪常續鬱攸無驚賈生之厝火無煙云爾

右文錄自採訪冊作者名失考

封邱縣續志

卷二十六 文徵三

十四

開封新豫印刷所承印

傳狀類

文徵四

先府君行實

何家琪

先府君姓何氏諱傳興字敦詩別字筱軒道光三十年進士治黃縣不一年卒先是嘗勞於東阿咸豐二年粵寇絕大江巢金陵旦夕窺河天下騷動文宗皇帝與二三大臣憂勤于上發吉林黑龍江兵南下徑山東所過郡縣征民車東阿道尤衝車具他邑闕輒促代踰期不反民病之府君資以價且後焉將出境豫探懷中金與兵令下一日東平州已納車廐中矣府君聞趨廐廐塞廐者給焉入廐廐開望見車府君左手以劍斷廐欄而右鞭叱之曰出出盡出未幾寇渡河陷金鄉陽穀高唐臨清諸州縣遂擾畿輔達天津京師幾震當是時東阿城孤危大軍遠屯土豪四起府君以縣小猝遇變難守先鎮內安逃民開廩給

粟會奸人謀乘飢竊發遂寢外多募勇士設疑兵伏要害以示強閒獨身出曉  
警禍福令止誅渠魁嘗詰一寇寇起若陰刺狀僕徐成在側兵之首已墮猶惜  
鞠未詳也以故其黨解散初廉寇覬行省亟趨張秋鎮焚舟梁塞渡口迄無警  
府君于是病府君明敏過人訟且判且遣之廉以自飭胥吏犯過引爲己咎胥  
吏退互責曰公如此我輩非人耶凡兵役防禦皆自割俸無秋毫侵民既病請  
告民乞留於大府不聽尼以媪婦府君轡車行病差移黃黃富多巨室喜交官  
與民事府君曰如是知縣可廢也且過在知縣不禁獄成陰得非法具毀之衆  
感泣曰微公幾陷不義卒七年有豪強擅殺獄人服先識云方守東阿時他縣  
爭上功府君獨不上曰職也欺而要罪矣黃平海寇如之府君厚於人而不可  
干府君父奉政府君愛闌或以進謝曰必藉是奉大人是明我不能子也配唐

封邱縣續志

卷二十六 文徵四

十五

開封新豫印刷所承印

氏子家琪家珍卒年三十有六五年八月甲辰也後二十年黃載志東阿祠名

宦焉家琪謹述

汝甯府教授何先生傳

王 壻

昔余侍先君子讀書濟南卽知有天根何先生先君子數年前教授門人也時  
余未及冠未知向學獨嘗聞談者呼先生爲狂士而已其後乃一再見於京師  
自光緒庚辰以後不相聞問者餘二十年及余視學河南甲辰冬按視汝甯始  
再相見則先生背偃髮蒼然與之語貌益濫氣益下使人浮囂之氣不戢而  
自消閒與縱談恨相得之晚追敘從先君子受學時輒相對泣下先生長余十  
五歲以先人故視余異恆人瀕行殷殷訂後會期今年夏余歸自懷慶乃聞先  
生死矣悲夫先生諱家琪字吟秋天根其別號也河南封邱縣人祖友勳積學

不仕父傳興道光庚戌進士官山東黃縣知縣有循績卒祀名宦妣唐氏先生幼負奇氣自爲兒童已矯然異於衆人好讀書左國史漢下及諸子靡不周覽爲文下筆輒數千言晚乃由博返約學宗程朱爲文直入昌黎之室同治元年中順天副榜光緒元年舉河南鄉試第三再應禮部試不第乃援例得教職選授洛陽教諭河南學者多從之遊所成就者甚衆著有古文方等書俸滿推升汝寧教授汝寧之士敬服先生亦如在洛陽也中州自前明李何兩先生以詩學倡迪後進國初有雪苑侯子以古文倡導海內遠近翕然成風顧近世學者日汨沒於功利詞章風氣亦少殊矣先生乃獨起而振之其時詩文皆卓然可傳於世近日大江以北能心知古文義法而不拘守桐城宗派者惟先生與吾鄉榮成孫先生然先生每自謂不及先生先生亦謂孫先生文吾不及也其虛

右文二首錄自天根文鈔按埽字爵生萊陽人

墓誌類

文徵五

松亭高司馬墓誌銘

李 蘧

吾友松亭司馬卒後之明年正月其弟軼三歲貢遣力專函來京據云先兄自川沙移病旋里客歲五月倉卒以卒今日月有時將葬矣丐一言以光泉壤奈敦姪用毀危故繼沒孫錦榮等童騃無似傑藥餌餘生此情何極捧讀之下泫然不知涕之無從也已乃曰以松亭學行循聲銘誌不備舊遊與有責焉其何敢辭松亭姓高氏諱伯揚字紹休號松亭家弟南耕丁酉同年世居封邱封故隸開封後改屬衛輝曾祖考諱能字漢儒太學生例贈儒林郎妣氏賈繼氏王氏陳例贈安人祖考諱大知字哲生增廣生地贈文林郎晉封奉政大夫妣氏

封邱縣續志

卷二十六 文徵五

十七

開封新豫印刷所承印

王地贈孺人晉封宜人考諱攀龍字叔健候選州同知勅贈文林郎晉封奉政大夫妣氏馮繼氏楊勅贈孺人晉封宜人昆季五人松亭爲之長次軼三伯傑歲貢次鶴村伯齡廩貢任汝州訓導次瑞亭伯祥武庠衛千總候選先卒次丹崖桂五附貢布經候選娶丁氏太學生魯玉公女男一敦培辛酉科拔貢試用教諭客歲六月卒女一適張氏守己武庠孫四錦榮涵濤燦松亭少精敏弱冠遊庠序舉業步趨先民曰利鈍所不敢知而爲之自我者當如是耳乙未歲試授知於武進莊方畊先生冠曹補餼課藝大梁時省垣肄業多名下士而院長桐城張樞亭先生獨爲器重曰桃李何如松柏丁酉獲選拔朝考補正藍旗覺羅教習宗學爲儲才近地英年奇傑觸目琳琅襄事經藝餘暇必取前代奇功偉烈有關大義者口陳指畫期遠到今詣其地猶相與稱松亭先生不絕而已

亦借以延覽博訪國典朝章與夫士俗民情無不熟悉故其後一膺民社遊刃有餘蓋無地非學矣報滿用縣發江蘇初署川沙同知兼松江管糧通判松江固水鄉而茅湖一帶更爲巨浸稽產蘆荻葦茅之屬茫無津涯居民往往畛畦構訟歷不能決一日奉委查訊距其地二里而近瞥見小艇載金刃他器鱗次排列而伏戎於莽者更出沒隱見不可測僕從恐有激變卽毅然徑前進兩造曰何乃以身試法今與若約限五日內投案對質不平不允長吏之過也聽上控必蜂雜蟻屯一有事草薙禽獮矣衆皆俛首帖耳日懇如約至卽爲批款導卻紛拏犀解無不歡呼稱神明而去再署蘇州海防同知及儀徵卸事後商民攀轅祖餞制府書聞之曰公何修得此曰餘亦未敢自信不過不索陋規耳制府喜謂同列曰吏不當如是耶嗣改上元丁外艱以去丙辰服闋發原省

署荆溪撫軍岳以挑挖猪波稱善補陽湖兼攝武進江左佳麗其五日龍舟競渡歷代傳爲盛事然人多語囉積弊時有銳意勸諭禁止未及而諸少年分曹構隙洶湧雜沓時恐興大獄卽馳救已掛彈章幸無事蒙睿鑒降二級示薄罰則其卓有先見與大憲之毫無瞻徇可謂各供乃職而聖恩優渥矣癸亥調宿遷嗣因陽湖經徵錢糧三年全完題陞川沙同知川沙新改撫民諸凡草創一切善後事宜必求完善慰貼不到耗公累民以杜將來弊竇惜力疾視事未免怔忡往往不寢食者累日因嘆曰遊子思故鄉卽呈請解任調理時各憲及共事諸公慰留數四泣曰第視吾經手帑項有無空缺足承關汶矣憲感其誠給咨回籍未三年而遂卒悲夫跡其一生清苦自勵雖仕籍二十餘年而操守如一日所至見吏役門印中有鮮衣怒馬者立斥以去尤嗜學能見其大其在宿

遷也星使旁午驛馬強半垂斃又地瘠民貧多額孔經手卽減從計口給食餘廉俸以補實之蓋幾乎數米而炊窘乏不能自存而處之怡然無難色其他歷任部署無不皆然丙寅引見來京旅邸小飲視其起居用度泊乎老諸生也語及外任甘苦曰謹飭足矣酒酣談鋒競起曰薄宦所羈不事場屋者二十年矣然技癢間作所謂每飯未嘗不在鉅鹿或以潘黃門賦數篇索解卽爲疏證詳確曰卑靡不足學迴顧牀頭有茅氏鹿門編次八家文集卽亂抽得昌黎禘禘議柳州饗軍堂劍門銘等篇背誦沫流矢口數行已令各書史事如唐牛李宋三黨以及勝國東林之類於小紙爲圖堆几上信探遺忘者浮衆皆支吾屢北而任舉一事無不枚舉顛末並其事非得失之所以然鑿鑿言之以是知其深沉韜晦不大醉不盡吐也其去年四月赴汝州學署意以各官一方覲面爲難

幸放閑得數日聚首同懷晚景爲之嗚咽豈意分袂未幾竟成永訣乎而一二事可以傳矣公其勿憾公生於乾隆九年八月十三日卒於嘉慶十五年五月十五日年六十有七以次年閏三月初七日葬於沙岡里北祖塋友人李蘧爲之銘男辛酉選拔貢生石夫敦培以昭穆祔焉銘曰

馬鬣四尺兮草紛蒼青有道豐碑兮惟吾德馨白楊蕭蕭兮遙識典型桂漿蘭精兮後嗣以甯

右文采自高氏譜蘧清進士任江西通省督糧道

清故進士邢公印中墓誌銘

高釗中

公諱守道字印中號霽亭河南封邱人也公於封邱爲鉅族高曾以來代有達人祖可勤有篤行父貴字天爵以孝聞前母氏李早逝母氏王方孕公有胎教

天爵公夢旭日而公生幼穎悟八歲能解書旨師大奇之四載通四子六經初爲文不屑爲凡近語年十七遊泮水道光乙酉舉拔萃科宗師俞君獎其文可頡頏明賢設帳授徒文行并勗門下得其緒餘皆掇高科噪一時而公首務居敬窮理敦行立命之學不徒以文章詞賦爲傳授同治壬戌癸亥聯捷成進士試用知縣籤發浙江以父老請終養主淇泉寡過兩書院其課諸生一如設帳時咸豐三年母氏違養同治三年天爵公以疾沒公侍疾時日夜目不交睫進藥必嘗遭喪哀毀骨立行路動容服既除不忘哀蓋先後一致云赴浙候補署景甯縣事下車首除正賦外加陋規日坐堂皇一無株留邑故健訟久之乃翻然曰何忍以是瘁賢父母也浙撫李公知其賢奉補平湖要缺於八年五月蒞事兼護乍浦同知平湖自被兵民徙土曠公乃募民闢荒不數年成肥饒爰設

清糧局具稟定稅治內陸清獻祠舊有田產奉祀傍於湖田既多售湖又淤積址界淆錯祠與民遂成積訟且數十年公勘知之出俸錢代贖戒勿售兩不使侵陸裔深德之光緒元年移知海甯旋調蘭谿下車值天旱民集衆將譁於官公登陴則礮幟林立城下蓋浙自陷於洪逆頑習未革黠悍之氓結黨拜盟每值水旱昇神像送官請禱每以滋事毀署公曰有天焉民其奈我何語未畢雷電大作下雨如注衆人曰邢公神人也乃解散移知仁和兼錢塘事治尤肅五年補西防同知於塘工費節而工固大吏兩以卓異荐遵例入覲返浙於九年十一月十六日祭畢而歿公有至性遇弟最篤財貨皆共之猶子輩賴以成立接物以誠御下以寬任事以勇居官二十年凡利必興之害必除之奉已儉約施舍不下萬金如增書院膏火創育嬰堂卹同僚楊君之喪贖鄉人既鬻二女

資金里中立義學他人一事足千古在公則餘事耳公生於嘉慶二十三年二月二十三日卒時年六十有六著有含辛齋文詩公餘隨筆記事珠諸書讀者於公竊有感謂其立身行政固不待言卽文章之瑰麗亦超越一世使食餼後聯翩直上則官至疆吏或躋宰輔得以罄其所學自足造福無窮乃知音竟爾難遭其拔萃貢也年三十二聯捷時年已四十有六以致屈居下僚施設止至此豈不惜哉雖然士有志用世艱於一第并不獲少展尺寸者又不知凡幾而在公固無憾也公元配曹氏無出繼配潘氏生二女字懷慶梁長垣焦側室梁氏生一女字固始吳孿生遺腹二子惟愷惟惺以公與余誼關同年知既悉契又深故樂爲銘云銘曰

以公性之純兮可立彝倫之極以公德之宏兮可躡聖賢之域以公學業之精封邱縣續志 卷二十六 文徵五 一二十一 開封新豫印刷所承印  
兮可爲太平之黼黻乃不獲大用於世兮而操牛刀於一邑蓋公自留有餘兮以遺澤於子孫千億馬鬣封兮公之宅後之人兮視此碣

右文錄自採訪冊按釗中守道之同年友也未詳何縣人丙子翰林國子監司業雲南督學使者

清故翰林院庶吉士吏部主事牛公墓表

孟昭槩

公諱東藩字景式先君子摯友也遜清戊戌大比天下士先君子家居讀禮未及與試公成進士入詞林榜發報捷猶以未得齊年爲憾時槩方幼讀卽習聞公行誼稍長游燕都與公諧嗣程遠猶子伯勗共硯席相處日久相交益密以故悉公品德尤詳今公歿二十有六年矣程遠等恐遺澤歷久而湮也擬壽諸石而以表墓之文相囑槩雖無似其又奚辭牛氏世居黃河北岸三合營代多



隱德至公考諱功凝者尤孚譽於鄉里公幼承庭訓奮勉攻苦寒暑無稍間年十九補博士弟子嗣與張先生星潤孫先生啟宇結文社觀摩砥礪所業益進公固祥符籍今開封人文之盛冠全省科歲試屢長其曹辛卯以殿元舉於鄉闈藝一出遐邇傳誦邵學使松年綦重公調入明道書院資以膏火得遍觀羣書交一時名士見聞益廣氣宇尤宏同業咸以玉堂人物期之而公殊不措意蓋時方潛心性理所志原不在是也乙未上公車值中東戰後國家阽危公痛外侮日逼嘗與先君子縱談天下事策慮懋憶義勇奮發一若重有憂者厭舊學空疏無補時會首都設學堂亟召子侄肄業其中親故多尼之公則毅然不爲動性至孝戊戌之秋丁外艱哀毀過禮大府慕其名敦請講學踵相接歷上蔡項城各書院均以實學倡服闋散館授吏部主事餘哀未忘抑鬱寡懽竟於

丙午八月卒於京邸春秋四十有四謹厚謙和與人無忤雖巍科崛起登顯仕猶恂恂如布衣時清季習尙侈靡京朝特甚公卓然自拔浮游塵外足徵所養獨至尤與先君子性行相近云子二長金駒國立北京大學法學士次金驥省立甲種實業學校畢業胞姪金釗與渠同班畢業於國立北京法政專門學校前湖北第二高等審判分廳推事今河南高等法院推事從昆季志趣各異皆能守公家法壬申仲秋謹表

右文錄自原碑撰文者杞縣孟昭榘字心垣河南通志館協修按東藩世居三合營該村原屬封邱前因東藩以祥符籍入學故表內以爲祥符云

君諱仲謀字鴻猷先世直隸長垣人姓王氏明中葉遷河南封邱縣之油房寨改姓張遂家焉曾祖諱宏圖字義文祖諱芸啟字秘閣父諱蓮生字息菴生三子君其長也生而聰敏勇於任事家計貧窘終歲樵採以資奉養年十四卽從事於耕欲以力田致富凡秉耒執鋤扶犁御輿等事無一不曉習精通晝夜辛勤與農夫佃戶同力作雖祁寒暑雨不少休息以故家中財產不及三十年田土增至十數頃房屋牲畜亦皆頓加數倍人或疑爲得外財助而不知皆君善於理家勤儉積勞之所致也家既裕令次弟就學讀書以世傳習武遂荐武魁君亦乘暇應試得入邑庠然以家事羈身未竟其業生性孝友雖自奉非約而奉親特厚與二弟相處和睦終身無閒言持身嚴正遇邪僻人輒以直言相責代人理事勞瘁不辭親友以事請調處者一以公是公非爲斷故鄉之善者好之而不善者莫不畏憚而遠避焉至其樂善好施關急濟貧受其惠者尤嘖嘖稱道不衰配朱孺人有婦德操持家政勤苦異常君之由貧而致小康以卒成爲富室者孺人贊助之力爲多君生於清道光二十六年十二月子時卒於光緒三十三年二月初七日寅時享年六十二歲孺人生於清道光二十一年卒於中華民國八年夏歷六月二十九日辰時享年八十歲子二人長鳴琴歲貢生次鳴珂優廩生京師法政專門學校畢業歷任開封洛陽檢察廳檢察官代理河南高等檢察廳檢察官任河南省議會議員女一適李氏孫三人世驥世驥世騏孫女五今將於民國十二年八月二十四日舉君與孺人之柩合葬於本村南原以狀來請銘銘曰

周傳教稼漢重力田化民成俗莫此爲先世風遞降人尙奢華民窮財盡舉

國興嗟卓彼張君獨探本務始致小康終成殷富勤儉傳家兼可風世我銘其德昭示來裔

右文錄自採訪冊按士傑武陟人賜進士出身禮部郎中兼典禮院院長

清邑庠生孫君俊卿墓志銘

潘炳麟

民國癸酉冬封邱孫桂宮以其母申孺人喪葬有期持狀屬銘諸幽泣而告曰昔治先子俊卿府君喪授兆粗具猝不及瘞石於壙負戾滋深今以爲憾桂宮師事余愛尤篤且以禮請敢固辭按狀君諱世英俊卿其字也邑增廣生性倜儻與人向不設城府曾祖煦字和遠太學生祖書升字掄秀邑庠生父勳字華國太學生母氏王生子四長世恩惠卿廩膳生次卽君次世敬慎卿次世慶賀

封邱縣續志

卷二十六

文徵五

一二十四

開封新豫印刷所承印

卿女一適劉君幼隨伯兄侍掄秀公讀恂敏邁常人母舅王公子善孝廉見而異之洎覽所作謂能窺先哲立言要旨益加器重然困於有司年二十六始補縣學生有名庠序間每屆書院校藝與中表崔君品三脩嶺昆仲互爭首選耳君名者爭欲一識君嗣因伯兄病歿閔凶迭覲乃絕意仕進一以館穀自給光緒甲午華國公病癩迷罔失其常態君侍藥餌必親調以薦戚戚疲勩壯志益灰析居後薄田八十畝累宿債數百緡家倍窘辛丑春風霾蔽野白晝晦冥麥苗盡枯君仰屋計無所出謀於孺人驅車馬渡河至通杞一帶鬻之易糧以歸孺人又悉典質簪珥衣物資助君得免饑餒民國改建家居猶單心興學振災清鄉諸公益不少倦壬戌君彌留時孺人常爇香中庭跣禱神明許以長齋茹素後孺人每濡淚拊諸子背而詔之曰慎勿忘乃父苦若能繼乃舊服崑然自

樹立者是肖子也初孺人室於君事姑孝饋爨必親概散必蠲頗得堂上歡撫前子猶已出居恆見乞丐經其門必給食與錢遺之去曰吾不忍觀若輩窮苦狀孺人善持家錢刀粟布經理秩然晚年猝患癱症亟治獲瘥民國癸酉夏竟以疾終時舊歷閏五月二十六日午時也距生於同治三年十二月三十日亥時享壽七十歲君先孺人十一年而卒時民國壬戌七月十五日申時生於道光二十八年七月三日寅時享壽七十有五元配張孺人生子桂生桂生中年以疾卒繼配孺人清嘉慶壬戌科進士授翰林院檢討申公子敬姪孫女延津邑庠生覺士公第三女生桂樹桂宮桂丹桂五女二適周適和孫男十人亢宗桂生出炳宗全宗傑宗桂樹出振宗景宗紹宗桂宮出儒宗燦宗忻宗桂五出孫女十一人曾孫男三人鴻賓鴻文鴻鈞曾孫女三人嗟嗟寒微之家醞於詩

書而學殖所獲則耆宿碩彥之堅苦卓絕與時趨輒鑿枘終其身鬱撓而不少舒不再傳而豫卜其子孫蕃衍門祚鼎盛者觀孫氏可知桂宮以孺人卒之明年春葬祔君兆銘曰

頌椒聊起式微崇有德家之肥授遺經編絕韋俊又興勝錦緋貽謀遠世莫違宰樹鬱蔭郊圻置閼宮魂所依

中華民國二十三年歲次甲戌夏曆二月

右文錄自採訪冊按炳麟字少梅汲縣人

碑記類

文徵六

重修儒學工程碑記

朴懷寶

封居大河之濱嵩岳亘其西扶輿磅礴之氣毓秀鍾英士之產其間者多磊落

不羣名公碩輔表儀斯世者又纍纍先後相望雖山川之鍾靈使然抑學校之培養有自也余己酉冬祇謁學宮覩廟中之規制尙多缺略未備者會商羣公而修葺之壬子孟夏厥工落成邑之搢紳學士咸問記於余余避席以謝曰是役也旣非經營締造之大又無丹楹刻桷之華但圯者起之缺者補之黯者新之已爾而協謀允臧者學師寅僚士紳之力也欣然樂輸共襄厥事者盡諸公之功也恢宏壯麗踵事增華又有待夫後之繼起君子也余一人何有焉余敢爲之記乎繼而諸君子復進曰封有學宮歲月積漸久多殘缺矣向之緩於修理者緣鼎建城垣頻年工役繁興未遑兼顧公前所作倡修疏已悉其大概今之不能已於請者公來攝封事正值嘉平日爲改歲兵刑錢谷諸規劃未及釐舉首以學校爲重况公之履斯土也清風兩袖車中唯琴鶴畫書相與攜隨迺封邱縣續志

慨捐廉俸修我封庠烏能默默乎余固辭弗獲竊曰學校爲聖天子興賢育才之地各上台化普菁莪飾修警泮任其因陋就簡抱殘守缺可乎今旣風雨除而苞基固榱桷挺而櫺牖新歲時行禮於其中履登殿庭則重門洞開會啟心迪性之功焉從事廊廡則八窗豁達悟弘通肆應之學焉樓閣崢嶸文運奎光允叶休明矣祠宇煥采巍科巨卿蟬聯鵲起矣不甯惟是士之游習於斯者羣趨高明正大之途潛修於斯者相安義路禮門之域詎必登闕里之堂覩車服禮器始深高山仰止之思耶余僻處鄰封藉手以報匪特俾外觀者欽其崇閎升堂者嘆其美備已也諸君子不以余言爲譎陋因不揣而記之

右文錄自原碑碑爲雍正十一年知縣朴懷寶所立現以仆仍存孔子

廟懷寶見職官表

重修儒學碑記

曾興柱

自古庠序學校之設非王政之本歟凡釋奠菜習鄉射執醬醕以至獻馘獻囚悉舉於學士之入其門者敦人倫端學術藏修息游與夫俎豆筐篚之詳其典禮咏歌擊拊之備其聲容於以優游而陶淑之德行道藝以賓興之歷萬世而不廢其爲地至嚴且肅倘風雨剝其隅霜露降於席其何以安至聖之靈爽而展明禋祀重道統乎封邱文廟創於唐之武德年間修於元至正明洪武至國朝順治十五年知縣事余縉重葺規制始備邑志可考厥後無聞焉迄今歷百餘年地勢窪下積潦瀰漫宮牆傾圯棟宇摧殘其遺址雜於荒煙蔓草中幾不可復識矣興柱於乾隆十七年承乏茲土目擊心傷曰此有司之責也特以補葺易爲功而創建難爲力時值水患之餘螟螣爲害日久靡遑至十八年復被

黃水賑恤孔殷則其爲民謀衣食而甯室家者心力幾無餘暇迨甲戌歲年穀豐熟民人樂業爰集閭邑紳士諭以讀書志道必思本源今廟貌摧頽及今不修後欲訪絃歌之地展禋祀之禮幾幾乎不知所向茲者先捐俸以爲倡率諸紳士及里民咸踴躍樂輸援擇紳士中之殷實老成者綜理之凡捐輸銀兩卽交司事登簿支給于是鳩工庇材所有石甃土木一切布置完備而不令其枯竄興柱及教諭殷杲督捕雇役察閱而董率之先將大成殿拆修次及崇聖祠及東西兩廡明倫堂敬一亭戟門櫺星門泮池奎星樓文昌閣又次及忠孝節烈鄉賢名宦各祠基址各培高數尺以避卑濕木石易新以期堅久先師栗主整理莊嚴啟聖王五代並四配十哲先賢先儒木主百餘逐加整理煥然一新自十九年九月十一日經始至本年十二月初一日落成除舊料留應用外新

添物料計用大小磚三十六萬二千四百餘個雜色瓦六萬三千五百餘個石條二百五十餘件石灰七萬一千餘觔泥土八十餘車油漆顏料一百餘觔各色工匠九千二百餘工統計用料價工匠費等銀一千五百餘兩自是巍巍璀璨誠敬聿昭不特觀瞻之肅已也興柱祇謁之餘偕司教諸公進儒生而告之曰聖天子崇學重道各憲樂育人材多士躬逢其盛務實行黜浮靡履其地而興車服之思沐其風而動羹牆之慕雲蔚霞蒸爲世黼黻胥于是兆之矣爰于禮器禮儀俟考核詳確次第修明竊有志焉未敢置也爰撫其顛末石誌之以示夫後之欲考其梗概者

右文錄自原碑碑已仆現存孔子廟興柱見職官表

創建主簿借署碑記

江名佚

封邱縣續志

卷二十六

文徵六

二十八

開封新豫印刷所承印

歲庚辰余承乏封邱主簿奉職奔走苦無公廨舊署在縣之右今其基趾無存歷任諸公咸勞勞無定宇余相度形勢得地於古黃池一名鳳凰池在大堤岸北卽清勅封將軍覺公諱得住建功之地也昔年水池深數十丈鼉鼉海馬出沒其中茲慶安瀾者數十年堤根堅固樹木暢茂視昔日之氣象固不侔矣余捐資購料敬詞申請各官借廉俸估工繕房共六十餘間外有棗梨桃杏千餘棵滋生環繞池之西灘爲官柳園并溝葦四頃有奇非惟以蔽風雨尤足以恣眺望始事於乾隆二十六年至乾隆三十二年各工乃竣夫余之爲是謀也豈以自安也哉官之有廨所以慎職守也而據險阨要亦於是乎在爰勒石以記使夫後世之官是土者審厥由來知覺將軍之功之不可沒相與踵事而歲修之是則余區區剏建之志也夫是爲記

右文錄自原碑碑在縣南河堤十五堡舊主簿署爲乾隆二十五年主簿江某所立房舍久廢惟碑猶存

重修封父亭碑記

侯于鄧

國家隆重祀典所以揚前休以垂後範其爲教化計至深且遠也余蒞任茲邑察諸祀典所載封父居其一詢其祠廟舊在關帝廟西北隅名曰封父亭久被湮沒遺址盡成水區將何以崇侯功報侯德而以妥以侑耶因稽邑乘相傳爲夏侯氏封茅胙土之侯其深仁厚澤之及於民者當時應被其鴻恩是以歲時伏臘而俎豆之也考其年歲迄今不知幾千百年矣而人心之感慕不謏不啻離黍興思焉余慨然興復捐俸倡首勸募士民樂輸資財遷其祠於關帝廟之右建修正殿三楹拜殿三楹丹雘塗聖精彩盡致是舉也仰慕侯德俯順人情

封邱縣續志

卷二十六

文徵六

二十九

開封新豫印刷所承印

恐久而就湮封父之明德宏功將掩沒而不傳也是爲記

右文錄自原碑碑現存乾隆三十七年立按封父亭舊在城西北隅經

邑令侯于鄧遷於縣西街關帝廟之右于鄧見職官表

重修使君百里公塚塋碑記

裴建星

昔者厲山氏之有天下也其子曰農能殖百穀故祀以爲稷共工氏之霸九州也其子曰后土能平九州故祀以爲社因以見後世之神皆前代之人凡生有忠於國死有利於民者往往建廟奉祀俎豆而馨香之蓋有德必報自在人心非偶然也縣之東北五里許有使君廟由來舊矣其廟址卽公塚塋考諸邑乘公爲東漢徐州刺史每歲旱車轍所經卽雨徐人感其德至今猶有遺祀焉吾封爲公桑梓鄉塚前建祠凡有所禱無不靈應如響蓋其精誠所結猶不忘乎



故土也但年深日永神塚幾與平地等子實李君峻嶺賈君善士也每當展拜之下不勝惻然因約諸善信各捐貲財共得若干金砌以磚石環以牆垣建立端門不數月而大工告竣自是而不騫不崩亦孔之固神有幽冥之安人益獲默佑之福矣事起於嘉慶二年閏六月望日功成於嘉慶三年二月二十九日因援筆而誌之

右文錄自原碑按此碑在邑東北五里廟崗使君墓前嘉慶三年孟夏上浣立建星學行無考

河南衡家樓新建河神廟碑記

清仁宗

黃河發源崑崙東流入於甘陝出三門底柱之險至於孟津遂浩浩蕩蕩以達於海其性挾沙易於壅積有壅積之害則難免潰決之患本朝百數十年以來

封邱縣續志

卷二十六 文徵六

三十

開封新豫印刷所承印

遭水患者屢矣莫不發帑堵築雖用民力即可賑恤實一舉而數善備舍此豈有良法哉予小子敬承大業恪守成規嘗恭讀皇考聖製文云河工關係民命未深知而謬定之庸碌者惟遵旨而謬行之其害可勝言哉煌煌聖訓實子子孫孫所應遵守歲癸亥九月已逾秋汛方盼安瀾之奏忽驚河臣嵇承志飛章入告河北岸衡家樓汛大河奪溜於十三日衝決堤身數日之間陸續塌寬竟至五百餘丈河流直注大名所屬長垣等三州縣遂入山東省抵張秋鎮橫穿運道下匯鹽河由利津入海此實予之不德上千天和以致大變然徒戰兢失措於事奚益亟命侍郎那彥寶馳赴工次總辦堵築事宜仍命巡撫馬慧裕總河嵇承志襄辦鳩工集料協濟帑金不下壹萬兩賑恤難民同時并舉直隸則命藩司瞻柱徧施大賑山東則命尙書費淳同巡撫鐵保督辦運道安民諸務

幸諸臣協力同心敬勤不懈使民受實惠而少流離運道疏通而鮮阻滯於十月初三日興工遺辦晝夜無停感昊慈垂佑隆冬冰薄全消汭凍人力易施又兼引河得勢計日可歲鉅工河之初決也予心焦急不得善策乃進廷臣詢訪咨諏以收集思廣益之效諸大臣各抒嘉猷入告俱隨時指示徧加探納亦有謂河北徙委之氣數乃禹治水之故道聽其自流不必堵築予心不以爲是豈有舍數百萬人民田產廬舍付之洪流况七省漕運要道尤爲國家大計若輕議更張是自貽伊戚非至愚者不爲也當更張而不更張固爲失算若不必更張而妄爲其害更甚治河如聚訟於茲益信矣河決在衡家樓北岸集夫鳩料築堤埝開引渠塞菱下埽疊壩刷沙工鉅用繁恐未能必成自興工後咸沐河神庇護毫無阻滯日有進益北岸施工倍難况大河全趨非漫溢分溜可比設

日而成雖稍有墊陷而旋轉甚速上蒼昭格如在其上甚可畏也予寅承大寶益亶敬勤虔惕之懷文不能述謹泐豐碑用紀實事是爲記

右文錄自原碑按此碑在縣南桑園東首廣佑祠嘉慶九年建計碑二  
一漢文一滿文東西並峙現俱存

重修青陵台貞烈祠碑記

齊承慶

易曰恆其德貞又曰婦人之道從一而終蓋婦者從夫者也常則以順爲正變則苦節能貞至於不以富貴撓其心不以生死渝其守從容赴義慷慨捐軀則戰國息氏之節爲尤足以扶綱常而維風化息氏之事一統志九域志以及古樂府古詩歸所載甚詳余博稽古蹟景仰遺徽卽未嘗不慨然嘆肅然敬丙寅夏承乏茲邑政餘披閱縣志又得諸父老傳聞益有以得其顛末固不獨烏鵲

封邱縣續志

卷二十六

文徵六

三十一

開封新豫印刷所承印

雙飛之曲而知其心之堅讀其兩淫淫之詞而知其志之決讀利其生不利其死之書而知其同室同穴情篤而摯也息氏塚並青陵台在邑東北郊陵谷變易金石銷沉台之故墟與鴛鴦塚連理樹皆無可復考弔古者每低徊久之康熙十八年邑令王公慨然有顯揚之志爲之立祠崇祀於是息氏之節愈彰而緬息氏之遺風者益有所觀感而興起百餘年來漸就傾圮邑紳魏等復醮資而重新之因以請序于予余維青陵一事諸書志之邑乘載之名公巨卿又復歌詠而傳記之則息氏之苦節不自余而彰亦不必藉余而傳特以發潛德之幽光垂令名於不朽而因以扶綱常維風化者守土之責也遂援筆而爲之記賜進士第知封邱縣事加三級記錄五次齊承慶撰嘉慶十一年歲次丙寅仲冬

右文錄自原碑碑現存邑東北青堆貞烈祠承慶見職官表

奉令豁免車馬雜派差徭碑記

陳允中

伊古取民之制不一惟唐初租庸調行之最久而無弊租即孟子所謂粟米之征也調即孟子所謂布縷之征也庸即孟子所謂力役之征也君子用其一緩其二傳有明訓矣自後世變本色而為折色而布縷力役兩征早並於粟米之中矣既并之則征粟米即不宜更征布縷與力役矣奈何布縷無征而力役仍征也今之車馬雜派力役之一端也力役既不宜征則車馬雜派之不宜征益明矣不宜征而征之民已不堪其苦况征之時復不別其土地之肥瘦而一概征之民其何以為生也吾封地濱大河屢屢決口平土變為沙磧和寨諸村為害又鉅是以與鄰沙辛口八社公為縣稟於乾隆五十六年奉上部發豁除糧

封邱縣續志

卷二十六 文徵六

三十三

開封新豫印刷所承印

十分之二至雜派差徭業蒙縣長陳公一概豁免奈何日後車馬差徭竟與不被災之區一例同派雖有免役之名仍受差徭之累監生齊可法生員李員惻然憫之公議懇稟於嘉慶二十年十二月十九日復蒙縣長全公批准遵照舊章前時受其累者今則蒙其福矣然諸社紳耆猶恐事之久而就湮也擬勒諸石丐余作文以記之故援筆原其始末而書之如此時嘉慶二十一年暮春上浣也

右文錄自原碑碑現在邑東八里和寨村中立允中邑人清廩生

新建封邱汎衛署碑記

黃 埧

封邱古封父國南臨大河地當衝要舊設城守把總一員隸衛輝營洎癸酉滑匪滋事上台以毗連之考城縣界兩省舊有營弁不足彈壓於道光二年奏設

考城營游擊守備各一員戰步四百名撥歸撫標而以封邱汎隸焉今把總李君國全莅任之始詢所謂官署者久經廢沒莫詳其處僦居廟舍於今二十稔旋奉添撥考城營兵十八名棲止乏所相與籌慮者屢矣歲癸未塤來治封邱以新設營員衙署估請建蓋奉大中丞新安公程奏准給帑興建教場營署塤台兵房等工次第創舉而封邱汎僅估建望墩二處把總衙署係舊設之汎格於例不便重估乃商之遊戎彭公永告武備曹公三畏曰兵旣奉撥則所爲兵房者亦宜隨地建造於是聯銜請于中丞奉批以考城營兵房十八間撥蓋封邱汎地仍命塤一手經理工竣以聞惟詳度縣城鮮有隙地且鳩工庇材曠日遲久乃以請建之項囑李君擇民舍之堅固可久者得於縣西門內閒市房一所計屋三十七楹完好無恙倍於原估之數因并地基契買略爲修整以作官封邱縣續志

署其餘俾兵丁止宿焉旣訖工李君來告囑爲記始末以告後之茲斯土者毋俾斯壤是爲序賜進士出身知封邱縣事黃塤撰文道光五年歲次己酉孟夏中浣穀旦

右文錄自採訪冊按此碑向在縣西街城守營立今不知移於何處塤見職官表

重修龍王廟碑記

高國寶

吾村西隅舊有龍王祠而土地司福陪饗左右春祈秋報村之人咸奔走焉顧其地狹其制儉不足以妥神靈而壯觀瞻嘉慶十一年村人李公名紹祖者首發善念糾合村人士及四方親友各捐貲財恢而廣之爲拜殿三間抱厦稱之刻桷丹楹極金碧輝煌之美迄今三十餘年而風剝日蝕漸就頽敗廟貌不存

靈爽何依李公懼其久而遂沒也不憚煩艱勸捐修葺使前功不墮吾村人士及四方親友嘉其爲善之誠老而不倦於是傾囊倒篋施無吝色庀材鳩功三閱月而落成其規模之宏敞丹朱之炫麗較前之重修有溢美以視舊制之狹且儉者其相去倍蓰矣可以壯觀瞻卽可以安神靈使後之人奔走於其下者羣欣然幸神之得所凭依而吾儕小民亦各以遂其所報之私而邀神庇於無窮不可謂非善舉也工既竣求予記其事是年自春徂夏彌月不雨予方搨管搆思俄而迅雷疾風大雨傾注豈事之適然相值乎抑神之因示靈應以堅人之信耶故併識之以爲後世之好善者勸是爲記道光二十年庚子夏六月立

此文錄自邑東十二里高產角村寨西門內路北廟中碑現在國寶見選舉表

重修旺龍庵碑記

郭廷翊

作無益害有益莫甚於修廟何則神之在祀典者國家自有常祭其不在祀典者皆淫祀也禮云十一廟庶人祭於寢皆謂祀其先耳他何與焉潭村有廟曰旺龍庵其所祀神則有玉皇泰山斗母王母南海大士三仙灶君韋馱諸名號歲久將圯戊子秋許君與里中諸父老謀葺而新之功既竣以碑屬余竊維天帝之祀泰山之祀南海灶君之祀皆非民間所得與其餘若斗母若王母與夫三仙韋馱之神其與祀典果居何等余固弗能深考也而廟而祀之者所在競趨焉雖勞力耗財不止是果何如哉蓋愚賤無知第以爲食其德則宜伸其報蒙其福則必獻其忱凡諸所祀皆謂其有功德於民不能忘焉其卽分所不當祀者亦欲以伸其報答之私而他實無所知焉書曰惇宗將禮咸秩無文祀典

之或在或不在姑置勿問可也大抵閭巷小民之所爲其心則是而其事未必盡是雖聖王固有不米鹽苛之者但使人人能矢此事神之心以事親則不敢忘其生我之恩以事師則不敢忘其教我之恩以事君則不敢忘其食我之恩推之凡所受恩之處雖一飯亦不忘焉則人人皆孝子忠臣仁人義士矣豈復有背死忘生辜恩負德者哉是則許君輩倡導之意四方布施之功亦未爲無益矣余乃書此付而勒諸石俾修廟祀神者曉然知事人之道不後於此也

右文錄自原碑碑現存該廟廷翊見選舉表

壩臺義地碑記

黃贊湯

嗟呼閭里兼併之豪詎甘心於朽骨草澤椎埋之黨庸殖利於哀邱顧乃私擅犁田詭謀竊壤將使新鬼故鬼各抱煩冤長殤下殤終歸暴露生丁天札卒邁

封邱縣續志

卷二十六

文徵六

二十六

開封新豫印刷所承印

凶矜天道有知久必加之冥報王章具在焉能違其典刑人之無良伊可畏也緬維道光二十七年兩河告歉旱魃橫行百室仳離流民徧繪道殣相望溝瘠難蘇封邱二壩之間又積骨成莽焉管河邑丞某暨署賢士夫救患卹災慨敦古處理齟掩骼聿準禮經爰自堤基以北迄乎丞署左右東界大工步道西界壩台步道規地爲域計地二十畝有奇共此一塚攸分百族死難同穴何防區處之嫌歿亦吾胞各致全歸之義其有未殭未化委蛻猶存者固爲特築幽宮無憂異物或軀壳不屬僅正首邱或支節偏枯惟餘骨立或失其瘠背而髀肉皆消或放厥官骸而皮囊現存或冥遭刖禍下體無遺或怪類刑天飛頭莫續或斷山魃之一足或橫長狄之奇肱蟲臂鼠肝或變本來之像蛇蚓蝸甲或留尺寸之膚靡不慘動析骸累椁區昇澤臻肉骨蓬顆分藏招醜於蠅蚋之羣奪

食於烏鳶之口禁採樵者五十里分難比於魯賢瘞亭葬之百餘棺功實超乎漢吏蓋是役既竣爲塚六七百數雖略加封樹而望之崇如維時建牌記凡五以誌事之原起並爲義塚上告有司丞署文書固彰彰可考也乃閱時綦久遂有附近編民同知鬱約始則私分茅土隱揚陸海之波繼且擅改桑田潛易山邱之局如掘草煮鹽及平塚地爲田諸弊往往而有徇利極乎壟斷趣畔至於屍骸本殊夏屋之封何堪日消試聽秋墳之哭奈彼宵深固陋俗之宜懲亦當官之不察余周視宣防博詢疾苦惡發邱之有漸憫守塚之不嚴久抱痼瘡亟謀申畫適據官紳等請頒厲禁俾護叢鄉副我初衷嘉斯美尙爰捐俸賜籍助興修懸桁楊以詰奸人區畛域以符舊址復飭主簿李恩榮千夫長李錫三五相檢校毋任侵踰慕陳廣漢之救捏俱寥恆口溯宋影城之改卜無取重勞亦

既轉廢爲興慎終如始矣第恐良法美意久而易渝仁術惠心後將不繼計安黃壤永閔青燐時會俄濶隄防必豫是用銘諸貞石昭告來茲務留三尺之崇勿縱一坏之盜庶幾魂遊蒿里免滋大厲之陸梁地近松廳長賴在官之調護云爾同治元年歲在壬戌季春之月督河使者廬陵黃贊湯記

右文錄自原碑碑向在義地旁立今已頽臥道左字跡漫漶幾不可識按贊湯字莘農道光進士屢典文衡號能得士時任督河使者

重修城垣碑記

駱文光

封丘古封父邑而大河旁枕太行諸山蓋形勝地也咸豐辛酉余承乏茲土見山河之壯麗人物之繁昌願與斯民休養生息敦崇禮教沐浴詠歌於聖朝之化導願以地界魯衛適當孔道比年風鶴告警竊謂治平之日宜以教養爲先



而時事方棘武備不可不豫講也因為披覽輿圖周視城郭考邑志城廣五里有奇建於明洪武初年宏治間增築護城堤我朝順治九年河決堤傾城亦圯十有八年知縣屠粹忠修之康熙三十年知縣孟鏐乾隆二十七年知縣徐碩士相繼重修嘉慶九年知縣蔣萬寧復修之歷今垂六十年頽廢殊甚恐無以資保障迺進邑紳耆告之或以經費爲難余議通邑二十六社下戶均出二千人任其力上戶鳩資具磚石僉曰諾遂舉是役經始於是年五月五日歷四閱月始告成高厚一如舊門樓礮台悉具越壬戌春復浚城隍千有餘丈深若干尺並置礮械以戒不虞於是城完而守城之具亦備方城之初完東匪由懷境適竄至民得徙避城中以免蹂躪之患余以是幸城之完而又樂民之相與有成也詩曰崇墉言言崇墉仡仡莒城之惡春秋譏之保障顧不重與抑余之意

尤有進焉夫城以資保障也而所以保障者更憑衆志以成城則團練亦保障之一端也爰於城完之後在城廂三里而近選壯丁三千人無事各安其生有事定期操演其操演仿八陣之法前後左右分隊列幟如聞警以所向應之兩翼夾進四方轉變庶幾哉人心固而城益固也自茲以後當與斯民休息敦崇禮義以仰副聖天子教養之意敢不勉歟是爲記

右文錄自原碑碑係同治元年十二月立今已仆存諸孔子廟文光見

職官表

重修文廟捐輸題名碑記

張澂字

黌宮之設所以尊聖教育人才也自國而郡而邑莫不有學煌煌鉅典宇合實永賴焉第規模不一而運會亦殊欲保護之務使固並岡陵永昭巍煥豈不重

有借乎人力也哉封阜近瀕大河地瘠民貧陽侯之波爲患屢矣以故復興頗仍難以言罄溯自嘉慶癸亥衝工漫溢邑治適當其衝上賴邑侯蔣太夫子盡心捍禦晝夜勤勞雖大流因之順軌東去而餘波所及遂致泮宮衙署闔闔民舍多被傾圮災困之區難與爲謀迨乙丑之春始獲合邑中富民巨族兩次捐輸刻期修造儼然如故兩廡簷前勒石歷歷有明徵也迄同治三年閱一花甲又遭秋雨連綿西廡中庭傾覆江右陶少堂父台時攝邑篆團防局辦公紳耆稟請提街市房錢二百千文葺而新之僉云若不次第重修則各處漸就摧殘所費實難貲算爲因爾日軍需倥傯事務殷繁從而中止至丙寅夏上青孫父師蒞任與學師劉香亭夫子徐小柴夫子合謀首先捐廉倡工同城官長共相附和在市紳耆無不踴躍承命並至里下互爲勸勉各竭棉薄所捐錢項上自

正殿東西廡五代殿文昌閣三代殿並戟門外之祠宇一例告竣惟泮池櫺門奎樓照壁闕然有待而上青父師已去思刊碑矣然道在天壤無廢不興惟聖之靈惠我福星於是禮堂張父台下車布政共仰神明親茲闕典極力經營捐廉分俸聿求厥成維時學師霖樵陳夫子襄贊之力爲最而梁溪楊夫子當接篆伊始卽慨施多金此成功之所以無遺憾也事歷十餘年功克奏於一旦兩夫子猶恐久而失其實也故急貞珉排列姓字不惟不沒人善亦可爲後起之好義者勸字幸獲隨官長紳耆之後微效奔走故不難覩縷而述之

右文錄自原碑碑現存孔子廟清光緒二年立徵字見人物志

重修封邱城隍廟碑記

樊振家

冥司禍福之說儒者弗道然欲使愚夫愚婦有所懼而不敢爲惡者則與之言

道德仁義每不如與之言禍福是故天堂地獄轉迴超度一切怪誕不經之談世俗奉若神明報賽禳祈必誠必戒及問名義所在莫能指其說之何從夫神道設教或可補教化所不及至若城隍載在祀典春秋致祭乃亦依附於怪誕不經之談而不求其名義所在豈非儒者之恥乎按城隍之名肇於周易泰卦大戴禮天子大蜡八其七日水鄴鄴城也水隍也有合於捍災禦患之義則祀之也固宜顧古未有廟吳赤烏二年始見於蕪湖越晉唐祀寢廣逮宋建隆後祀遍天下明初爲壇以祭加封號都曰王郡曰公州曰侯縣曰伯尋詔停封號仍建廟宇國有大災則告祭焉在王境者王主之在郡州縣者守令主之國朝因之典至隆也封邑城隍廟創自明洪武五年弘治萬歷間修葺者再國初順治九年河決廟毀重建之乾隆六年復加修理迄今垂百六十餘年矣風雨剝

蝕又將傾圮邑人士懼無以妥神靈而肅瞻視也謀新於邑侯山陰謝公葆榮捐廉倡其首募及城市鄉里二十六社爭踴躍樂輸共捐貲得若干爰鳩工庇材自正殿而寢室而兩廊旁及樂舞鐘鼓各樓若廣生殿者舉舊制而煥然一新邑紳張君銳孝廉董其事

張君文運

贊襄之經始於甲午之春落成於丁酉

之夏向之椽題不備者至是而楹桷得宜矣向之閭晦無色者至是而雕甍改觀矣瞻神像之莊嚴仰明威而忱惕作善者必益堅其志作惡者必益褫其魄度其精神氣象應有與廟貌俱新者則豈非修葺之功有以肅斯人之耳目也哉功之所至名亦隨之後之溯厥顛末者僉曰基址所在某先生之所創建也殘缺重完某先生之所補葺也規模式廓某先生之所續修也則先生等均將不朽卽忝爲傳記者亦與有光榮焉若先世俗禍福之說則仍付之神道設教

存而不論可矣是爲序

右文錄自原碑此碑向在舊城隍廟頭門左側光緒二十三年夏月立  
民國二十三年因偶像無存人就所立地址將碑掩埋振家見職官表

重修封邱文昌閣碑記

樊振家

前漢書天文志文昌六星四曰司命五曰司祿周禮以醮燎祀司命司祿漢唐  
迄宋弗替厥後道家謂命梓潼掌文昌府事及人間祿籍故元加號爲帝君而  
天下文士乃有祠祀者洎明遂崇祀學宮我國家右尙文教祀典隆重昭茲天  
壤矣封丘澤宮之坎方舊有文昌閣創始於明邑令王公三極國朝順治九年  
河決圯於水邑令屠公粹忠重建之孟公鏐復加修理越至於今蓋二百年修  
廢莫詳邑志而閣亦摧殘傾圯鞠爲茂草矣光緒辛卯余捧司訓檄來是邑惻

封邱縣續志

卷二十六

文徵六

四十一

開封新豫印刷所承印

然懼無以安神靈而肅觀瞻也乃謀之莫廣文秀升同請於前邑令長沙左公  
輔而更新之左公慨允籌資爲士林倡嗣經任漢陰陳公熙愷冀州王公玉山  
滿州裕公崑廣續籌之不足則余偕同寅暨首事諸君各捐資俸相助經始於  
丙申八月迄戊戌十月工竣有閣傑然而高有台屹然而固巍巍乎誠足安神  
靈而肅觀瞻矣閣前敬一亭明倫堂及周圍牆垣日餘資次第修葺煥然一新  
落成之日邑人士請余記之余惟學官之不舉其職也匪一日矣如余禱昧無  
學承乏其間思有以舉其職而不能顧教人爲善之心則不敢一日忘也其無  
欲而爲善無畏而不爲不善者固能求之六經四子書躬行心得上躋於聖賢  
之林若中材以下苟有道焉使其憬然知所向慕稍遏其無等之欲知者有所  
勉以成其善愚者有所畏而遠於不善亦士大夫有世教之責者所樂爲也然

則斯閣之修俾觀者思司命司祿之由詎不有以啟其向善之心而動其遠不善之念哉是役也始終勤事者邑人翰林院待詔張君獻之總其成歲貢黃君鶴鳴等勦助之計工匠木金漆等款通用銀若干兩釐金姓名例載碑陰用垂於後目待夫踵修於永永無極者謹記

右文錄自原碑係光緒二十五年小陽月立現仍在文昌閣前振家  
見職官表

倡辦塌地請准蠲緩碑記

白 欽

竊維黃河流域遷徙無定河灘地勢塌閃靡常沿河居民突富突貧因河勢爲轉移而納稅之實力卽視塌閃爲增減查吾儕所居地點向西向北純係流沙向東鹽鹹不宜播種惟向南灘地土性肥美五穀豐登實吾等臨近各村命脈

封邱縣續志

卷二十六

文徵六

四十二

開封新豫印刷所承印

之所係前次河勢平穩距堤十里之內盡屬膏腴耕田納稅乃人民天職向來沿河各村對於徵收租稅無不踴躍輸將爭先恐後自民國三四年間河勢北遷雲騰二區先爲塌入五六年間調陽相繼及至今春河患頻仍塌離堤根僅百餘步耳堤防之未破者岌岌可危前此膏腴良田盡成澤國桑田滄海之感就在此轉瞬間沃野付諸東流貧富立即懸殊命脈斷絕糊口無從哭地號天挽回無術人方救死之不暇又何從有納稅之力然無人倡辦何能豁免被塌各村悉惴惴焉恐遭催科至門之逼幸有李七寨村王君壽亭者急公好義出爲倡辦邀集各村村長造具塌場清冊聯名呈請緩征蒙縣長王訪陸先生親詣塌場所逐段勘明立即轉詳復蒙道尹范大人省長趙大人派委查驗屬實轉咨到部呈請大總統核辦准予緩征在案各村紳民同深感激公議立石紀念

藉頌縣道省長及大總統恤民之至意并誌王二君及協力人等一片熱心苦  
賜於不墜云中華民國七年十二月四日立

右文錄自原碑碑在縣南李七寨南大堤頂立今猶存按欽字敬亭開  
屬司莊人清文生

民產紀念碑記

寧蒗亭

聞之財出於地民生於財財者民所依以爲命也吾邑自清嘉慶八年河決衝  
工凡民間價買良田盡被沙壓當時軫念獨切丁地酌給豁免雜派概予蠲除  
當以河行未久舊迹可尋准民各照契據分段劃界或栽柳葦或加開墾務使  
被災餘民永賴此利以謀生活嗣因雜派累民與未被災各社一併攤派當經  
辛口八社紳民呈請上憲屢准照舊蠲除事詳和寨莊古碑文內至民國六年

封邱縣續志

卷二十六

文徵六

四十二

開月新豫印刷所承印

官產處成立凡各縣官產均派委查出列表此地並未列入獨談委員私受賄  
賂不加調查誤指此地爲官產估價變賣斯時沙河兩岸各村別無田產合仰  
此以糊口苟失其利如魚失水將何恃以延殘喘萬民號呼大觸公忿爰有吳  
化南李廷璧張清河黃蔭枏李根旺王成方諸君約爲公會共推代表龐奉先  
路步洲齊鎬王賓王慶元王致南陳召南賈書山諸公赴省長公署及財政廳  
迭次陳請蒙批飭縣查實稟覆核奪幸賴邑侯修公西林調查古碑勘驗契約  
分劃官民界限確指此地爲民有稟准立案以後永爲民產是沙河一帶之居  
民不惟危而復安各食幸福而世世子孫視此利賴無窮尤當永矢而弗諼也  
是爲序

右文錄自原碑按此碑有三一在和寨一在張光一在大岸民國九年

桐月立芾亭字茂棠大里薛人清廩生

縣長姚公慰宗救濟水災紀念碑

牛東翰

姚公我縣長接篆視縣事迄今已三年餘興利除弊茂著政績固已誦聲載道有口皆碑矣昊天弗吊黃水爲災三年之中河決者屢吾封數十萬生靈幸免陷溺凍餒之慘尤微姚公之力不及此盤根錯節始別利器爲政在人顧不信而有徵歟癸酉夏河決柴房大莊水深丈餘邑東九十餘村咸被淹沒區長侯文波飛呈報災公聞之跋涉巡視施饋數萬觔刼後餘生全活綦重復呈請大府蠲緩丁漕發急振受福護者尤夥焉翌年秋貫台決口水勢益盛境內千餘方里盡成澤國公請振之外塞口築堤藉防黃流改道並於無災區域勸捐粟米設收容所十三處顛沛流連之氓以歸以養困斯用紓築貫孟堤以冀永脫

封邱縣續志

卷二十六

文徵六

四十四

開封新豫印刷所承印

浩劫乙亥夏而河決店集溺斃者衆三堵三決慘苦萬狀公憂鬱成疾亟請辭職民衆聞訊驚惶莫名公電挽留幸獲邀准而店集決口擴大慘狀已不堪言矣公以閭邑愛戴之誠任事愈勇工作更力未幾而河又暴漲乃親督民工數千人持畚荷鍤晝夜罔懈沐雨櫛風不遑寧處以故衆情感激益事奮勉不十日而厥功告成二麥以播人心大慰復向農村合作社貸款六萬元請振二萬元災民始有更生之樂焉乙亥冬凌汛突至潰溢四出公聞報惻然謂雙王口不塞其害無已復督全縣民夫修堵竣事丙子夏請工振洋二萬二千元協同長垣共塞蘇莊沙窩武樓各口炎風烈日中與民夫共辛苦墊餐露宿無難色無倦容德澤廣被及于鄰省是尤不僅邑人士沒齒不忘者矣而吾人之各宅其宅各畝其田頻受博施之惠克免催科之擾其感慕當何如耶爰爲闡述事

實樹諸瑣珉用誌不忘使後之覽者於以知姚公救災德政閱千萬世如一日云公印家望字慰宗原籍浙之紹興今寄居杞縣爲杞人歷官新蔡伊陽縣長所至有政聲至與役諸君子如科長劉庚金汲壽鏞鄧瑞珉區長崔鵬揚侯文波振務分會委員張鳴珂朱湘濱齊倫尹鴻猷賈自修朱廣敬王寶善張家駿張鳴燦李國賢輔翼肇畫之功咸不可沒例得備書

右文錄自原碑碑在縣東留光集民國二十六年元月立東翰字宣臣邑人清廩生校正者河南通志館協修杞縣孟昭準書丹者河南育才館畢業邑人侯立中

銘贊類

文徵七

楊公開三像贊

并序

王紹唐

封邱縣續志

卷二十六

文徵七

四十五

開封新像印刷所承印

公諱運太字開三世居封邱後吳村性廉鯁篤於孝友幼從師讀甚穎悟性嗜書而中年以家累輟學泊家道小康卽設塾延師以獎勸後進爲己任科舉廢公創設國民小校三鄉村子弟受公培植者益衆邑侯鞏公獎以熱心教育匾額公以事屬虛榮弗懸也公充任社長村長先後三十餘載閭里有爭輒盡情排解故本村百餘家及公身無以訟事破產者公喜施與行旅過門輒留膳飲故走卒販夫至今猶頌公德弗衰公昆仲四姊妹各一姊適賈生女三晚年失明妹適高生女一早逝而家皆貧盲姊及兩家遺孤公皆迎養撫育遺嫁若已出姊壽七十有四終公家還塋如儀公元配氏張無出早卒繼娶高生子二長慶康耕讀爲業克承公志次慶裕法專畢業歷邊軍政法各界以廉明見稱於時皆公庭訓之力也公生於清咸豐元年卒於民國十五年壽七十有六予視



公像有感因紀其生平概要而爲之贊曰

公像在堂公行在鄉天性孝友親心無傷庸德克敦何用不臧興學育才振聳起盲宜國宜家澤流彌長懿歟我公誠渡迷之寶筏而救苦之慈航

右文錄自採訪冊紹唐字繼勳應舉人

縣長姚公慰宗救濟水災留影紀念贊

侯文波

民國廿二節屆端陽慰宗姚公來宰我疆清勤圖治謀民安康河伯肆虐黃水波揚三四五區洪流湯湯獨我四區慘苦異常房屋倒塌物粟淪亡嗟彼老弱身喪巨浪我公巡視目覩心傷買饋救急活人無量請求振濟蠲緩漕糧災黎被澤生聚有望胡天不弔連降慘殃廿三廿四橫流汪汪設所收容民鮮流亡修堤堵口呼籲奔忙貫孟築堤保障河陽店集堵口率衆弗遑二麥既種農貸有方廿五元月積凌水漲冰水滿室飢寒備嘗我公聞報卽謀預防乘春農隙口堵雙王更請工振築堤救荒蘇莊起點止於孟崗堤基已建外用柳鑲連年救濟恩澤溢洋嗷嗷災黎免死他鄉我公盛德山高水長留此肖像永矢弗忘

右文錄自採訪冊文波見職官表



